


Ч. 38. (73.) Крыница, четверг дня 10. жолтня (27. вересня) 1935. Рок II.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Также просиме присылати членскы вклады до Лемко-Союза.

Просиме присылати материал до календара на рок 1936.

## Што може нам дати Т-ство одной бандуры.

В попередных числах Лемка поруплено справу Руской Бурсы в Горлицах и поддано проєкт, штобы помочи той бурсі через закладанє по селах „товариств одной бандуры”, котрых члены дали бы каждого дня по одной бандурі на удержанє бурсы и ей воспитанников.

Проєкт тот сам собом добрый, має однак тот недостаток, же никто сам той бандуры каждого дня до бурсы не отнесе, а зберанє каждого дня по одной бандурі от селян было бы так коштовне и утяжливое, же бодай, ци оплатила бы ся скоро за выправу.

Роздумуючи над тым проєктом, я приходжу до пересвідченя, же проєктодатель оставлят совсем свободну руку каждому селу в выборі способов збераня тых жертв и тому уважам, же наилучше и найдогоднійше было бы такы жертвы собрати от людей тепер в осени и то за цілый рок.

Одна бандура денно, то 365 бандур рочно. На число здає ся тото дуже, але як возьмеме под увагу вагу бандуры, то переконаме ся, же то совсем не так много, бо 365 середных бандур важит от 28 до 30 кг. т. зн. одну господарску окописту четвертку. Четвертка бандур при розрахунку рочно, особенно в том року, где слава Богу, бандура ся зародила, никого не знищит, а бурсу споможе сильно и даст ей возможность не лем выкормити и удержати находячу ся в ней школьну молодеж, але также позволит ей розвивати ся и в разі потреби аж и розбудовати. Штобы каждый жертводатель зрозуміл, до якого великого діла он причинят ся, даючи одну четвертку бандуры, я позволю собі представити собі цілый рахунок. Пересічно можна числити, же każde село має по 100 господарств. Тож если бы всі дали по одной четвертці, то с каждого села пришло бы 100 четверток бандуры, што перемінене на вагу дало бы 25 метров. На Лемковщині

єст 250 сел, але берме лем 200, то и так можна бы собрати 5.000 метров т. єст 50 вагонів. Если принять, же ціна бандуры выносит тепер 4 злоты за 1 метер, то 50 вагонів представляют вартость 20.000 зл. Великий гроши и то с той одной бандуры денно, даной всіма. Недармо люды гварят: „громада—то великий человек”, бо напавду, при доброй волі и охоті без убытка для себе, може зробити велике діло.

Неодному може, коли давнійше вычитал в Лемку о таком проєкті, здавало ся, же то шкода начинати, бо тым нич дуже не зобит, але тепер с рахунку каждый переконуює ся, же можна и с одной бандуры сотворити маєток, лем треба, жебы тоту бандуру дал каждый.

Если наши предкы своима жертвами собрали такы фонды, же закупили прекрасны маєткы на бурсы для своих учачих ся дітей, то мы обовязаны удержати и розвинути той маєток. Жертвованный грош, ци бандура иде не для дакого чужого, але для нас и для наших дітей, котры по окончению школ станут в ряды нашей трудовой интеллигенции и оживлят наше народне, культуральне и економичие житє.

Прото всі села, зберайте якнайскорше жертвы и посылайте их до Бурсы в Горлицах.

Просатар.

## Як росчислят ся доходы с кооперативных склепов.

Дакотры кооперативы мають по два и три склепы, росшмарены по ріжных лемковских селах. Якеси село, вмісто закладати отдільный кооператив, порозуміло ся с членами кооператива сусідного села и при их

помочи и за их згодом, открыло у себе склеп-филию даного кооператива. Користь с такого лученя поодынокых сел єст тота, же: 1) не дробят они своих сил, 2) не поносят коштов реєстрации кооператива, 3) ошаджают на членских вкладах до ре-визийного Союза кооперативов.

Случає ся однак часто, же такы два склепы, належачи до одного кооператива помагают собі взаимно и живут с собом в згоді лем до часу зробленя билянсу. Має тото місце особенно втотчас, коли оден склеп выказує высши доходы, а другой — низши. Втотчас члены кооператива, котры живут в селі, где склеп дал вызши доходы, хотят, штобы тоты доходы остали у них, а члены кооператива с села, в котром склеп дал низши доходы, старают ся переконати тамтых, же цілый доход с обох склепов єст загальным маєтком цілого кооператива. При таких розрахунках повстают часом звады, котры можут принести непожаданы и шкодливы результаты для економичного розвита наших сел.

Штобы в будучности не доходило до такых шкодливых дискусий, всі члены управы кооперативов мусят все памятати о том, яка єст задача и ціль кооперации и якыма средствами и сдособами доходит кооперация до той ціпи.

Передовсем мусиме памятати о том, же кооперативы не сут капиталистичными сполками, в котрых зыск обчислят ся в пропорции вложенного капитала. Таке пониманє кооперации єст ошибочне и яко противне духови кооперации—шкодливе.

Правда, члены кооператива вплачают уділы и от тых уділов може обще собранє признати членам дывиденду с зыску кооператива, але высота той дывиденды єст законом ограничена, бо головны зыскы с кооперативов склеповых признає ся в першой мірі тым членам кооператива, котры цілый рок куповали товар в кооперативном склепі и то в пропорции сум, вплаченых членами кооператива за товар. Такой розділ дохо-



Пренумерата в краю:

30 грошей місячно,

80 „ квартално

1.50 „ полрочно,

3 зл. рочно.

В Америкі: 1 дол. рочно.

В Чехословакии:

2 кор. місячно, 10 кор. полрочно,

20 кор. рочно.

Кonto чекове Нр. 404.155.



дов кооператива (понятно по признанию сум на цілі предвиджені законом) єст вполні правильний, бо кооперативний склеп єст власностью всіх членов кооператива и они мусят ся о том переконати, же аж и втотчас, коли они в том склепі платили за даякий товар дост високу ціну, не платили ю комуси чужому, але тота надвыжка ціны вернула ся им по выказаню доходов кооператива. Лем таке пониманє и такий розділ доходов с кооперативных склепов заохотит людей до вписаня ся в члены кооператива и до купованя товаров в коопер. склепі. Штобы однак знати, кто килько товару купил в кооперативі, треба каждому членови дати малу книжечку, в котрой вписує ся все закуплений членом товар. При конци року счислят ся всі книжечки товаров членов и пропорционально до куплених в кооперативі товаров, розділят ся доходы, звычайно в товарах.

Бывають однак случаи, же члены кооператива на общем собраню ухваляють не ділити доходов, а оставити их в кооперативі в ціли увеличеня оборотового капитала. В таких случаях, понятно, зыск остає, так, як он был все, власностью кооператива, а не отдільных склепов. Не можна того зыска ділити так: н. пр. кооператив А має два склепы, оден в селі С. и в том селі находит ся фирма кооператива и другой в селі Г. Склеп в селі С. дал меньший доход, а склеп в селі Г. выказал доходы высши. По зробленю билансу дыректор кооператива, живучий в селі С. жадат со склепу в селі Г. выплаты половины доходов с того склепу, мотывуючи нпр. тым, же при закладаню дочерного склепу в селі Г. кооператив в селі С. и он сам, яко дыректор, дали на товар до склепу в селі Г.  $\frac{2}{3}$  части грошей, а члены кооператива с села Г. лем  $\frac{1}{3}$  часть грошей. Основанє ошибочне и ложне и яко таке мусит дати ошибочны выводы. Сам основный капитал не грає ту великой ролі, бо то не капиталистична сполка, лем кооператив, але доходы кооперативного склепу в селі Г. сут заслугом членов кооператива, живучих в том селі, котры поперили тот склеп и всі товары в нем куповали. Тож доходы обох склепов, находячих ся в селі С. и в селі Г. сут власностью кооператива, але если члены того кооператива хотят их оставити на увеличенє оборотового капитала, належит их оставити при склепах и то в той высоті, в якій склепы выказали доходы. Того требує интерес самого кооператива, котрый, видячи, же оден склеп розвиват ся лучше, оставлят ему больше капитала на товар.

Штобы не встрішити ся с евентуальным упреком сторонничости, зазначам, же высше наведений примір подал я лем, яко примір, а не яко факт, с даякого кооператива. Росходит ся лем о добре зрозумленє задач и цілей кооперации, котра не знає под — и надначальства и трактує всіх своих членов одынаково.

## Путь до добробыта.

Много раз писали наши рускы газеты о ріжних сельско-господарских справах, даючи совіты нашому селянству, як найлучше провадити свою газдовку, штобы увеличит свой доход на невеликом куснику землі. Много также наша интеллигенция на всяких собраниях говорит на тоты темы, подносячи перед селянством користи розведения пчоловодства, кролиководства, садоводства и т. п. Але наш селянин єст консервативный и так долго не даст ся намовити, покля сам на власны очи не увидит и не переконат ся.

Такий способ переконаня виділ я именно в часі одной подорожи в пов. Городек ягайл. на Львовском передмістю и о том хочу читателям нашей газеты оповісти. Селяне Львовского передмістя—міщане мають мало землі. Штобы зарадити ввоєй біді, начали сіяти лен. Ну, думам, сіют, то добре, всяди сіют, штобы мати тот лен потом на свои потреби власны. Але не так. Сіют не для себе, а на продаж. А ци оплачат ся заимати ся тым, преця тепер всьо не поплатне? Так, отвічают, оплачат ся. Для засіяня одного морга, треба купити насіння 100 кг. и лен тепер коштує 35 зл. С одного морга можна мати 5—6 метров льну, а кромі того зерна на олій. Питаю ся дальше, а што робите с тым льном? Продаєме по ціні до 150 зл. за 1 метер того льняного клоча. Роботы єст коло того много, але даєме раду в тот способ, же купуєме разом 3—4 газдов за 100 зл. специальну машину и она нам много помагат.

Кому ж продаєте тот лен, ци сут купцы на него? Питаю ся. Так, купцов єсть много, жида, интендентура войскова, кооперативы и т. п. купуют и высылают до фабрык, бо на лен єст велике запотребованє в Лодзи—кажут.

Не вірил я, понеже сам належу до консерватистов и старых людей, але смотрю, всі міщане Львовского передмістя лем и занимают ся тым и заповідают, што с новым роком засіют ище больше того лenu, бо с того єст великий доход.

Добре было бы, штобы и наши околицы заняли ся том справом, особенно наши горы, где наш селянин так тяжко працює — так бідує, не маючи хосна со сроєй работы.

Наши економічны организации повинны заинтересовати ся том важном для добра села справом и повести акцию в напрямі масовой управы лenu, особенно тепер, коли спрос на лен має всі даны, што ціла єго продукция буде закуплена. Кооперативы наши повинны разом со скупом сельско-господарских продуктов, заняти ся также масовым скупом лenu и вырвати селянство от вызыска єго посередников-жидов и инших спекулянтов. Найлучшим покупателем буде безусловно войско, котре потребує того лenu для фабрык, вырабляющих товары для войска и котре заплатит добру ціну. Тым способом наше селянство достане ище одно жерело доходу и доходу вірного.

В горлицком окрузі веде тоту акцию инженер Здражилик. Я лично виділ лен до 70 см долгый, хоц засіяный был дост поздно в селі Вапенном. Єст то доказ, што лен и у нас удаст ся.

О. Я.

## Закладайме сады.

Найлучше до того надає ся осень.

Переведена в р. 1926 анкета выказала, же в Польщі находило ся садов 245.738 га. Наибольше садов было в воєводствах всходных и там занимали они пространство 88.284 га, што робит 2  $\frac{1}{10}$  ужиточной землі. Друге місце занимали воєводства центральны с 79.186 гектарами, находячими ся под садами, дальше воєводства полудневы — 55.078 га. и западны — 23.090 га. В садах тых начислено загалом 36.855 тысяч розличных овощных дерев, аджек кус больше, як одно овощное дерево на 1. жителя. Єст то барз мало, бо в сусідной Німеччині припадат на одного человека 4 дерева.

Але и тот стан упал сильно в часі суровой зимы в р. 1928/1929 року так, же тепер єст всього около 16—17 миллионов родячих дерев, то значит, же на одного жителя припадат ледво  $\frac{1}{2}$  дерева. Нич дивного, же каждого року спроваджаєме с заграницы дост дуже овощей и платиме за них великы сумы. Спроваджаєме не лем овощи полудневы, як цытрыны, помаранчи и т. д., котры в нашем климаті не можут рости, але также яблoка, грушкы и сливки, котры у нас удають ся знаменито. В виду того овощной сад може дати не злы доходы, а же овощных дерев маме мало, прото, можна предпологати, же доходы тоты будут певны через долги літа, а в каждом разі, овощи буде можна все легко продати.

Осень єст найотвітнійша пора року до закладаня садов и тому, кто має того наміренє, повинен уж тепер поробити отвітны приготовленя. Памятати однак потреба, же и ту єст потребна розвага, бо сад може быти на одном місци килькадесят літ, але може также нанести властительови страты.

Передовсем треба ся призадумати, які гатункы дерев наміряє садити. Вимогы сут розличны. Сливы переносят землю мокраву о неглубокой верстві уроджайной землі, бо они закореняют ся плитко. Яблони переносят также добре землю мокраву, але требуют уж глубшой землі. Ище глубше закореняют ся груши и черешні. Свойства тоты треба мати в памяти, бо если вода подходит занадто близко поверхні поля, то дакотры дерева овощовы на таком поли рости не можут и гынут. Найвыбагливши сут груши и черешні. Яблони любят місце продувне, а груши місце затишне. На плиткых пісках росне добре вишня звычайна, чорна, барз попытна в містах на конфитурь и другы переробкы.

Каждый гатунок дерев числит тысячи отмін, але не всі дадут доходы, бо тото зависит от місцевых условий. Як живєме близко великих міст, а особенно літниск и курацийных місцевостей, где приїзджат в оден час много гостей, там добры результаты дадут дерева овощовы, вчас, як черешні и літущны отміны яблоней и груш. Коло великих міст треба плекати черешні, яблони и груши отмін десеровых.

Если кто закладат сад далеко от міст и от желізниц, то не повинен садити у себс черешень, котры не дают ся перевозити. Таксамо со сливок дадут ся дальше перевозити лем т. зв. быстрицы (венгеркы) Яблони и груши найлучше плекати в отмінах зимущных. У нас аж и тепер єст за дуже отмін літущных и осенных. Прото тыж в осени маме моц овощей и дешевых, а уж в грудні спроваджаєме овощи с заграницы и платиме за них дорого. Коло міст лучше єст плекати отміны десеровы, а далеко от міст надають ся отміны меньше выбагливы и переносячи добре транспорт.

ПОМІЩАЙТЕ  
ОГОЛОШЕННЯ  
В ГАЗЕТІ „ЛЕМКО”



## Як робит ся олійну фарбу.

По очищеню, выреперованю и побіленю хаты вартат двери и рамы в окнах отсвітати и помальовати якомси милом для ока фарбом, котра ціле помешканє розяснит. В той цілі по замазаню шпар и вправленю шиб, а также выскрептаню шмыргльом решток старой фарбы, котра отпырскуює звычайно в многих місцах, двери и рамы мажеме легком верством олійной фарбы. Робиме то часом два раз (другый раз аж втотчас, як перша фарба добре высохне).

Таку фарбу може собі каждый зробити: Ростерти пару дека фарбы на порошок, жебы небыло грудок и заляти покостом и терпентином, розтираючи разом на одностайну теч. На 4—5 дека фарбы дає ся 30 дека покосту и 7½ дека (¼ часть) терпентины. При білої фарбі (цинквейс) треба до ней додати фарбы ультрамарини, штобы не жолкла.

По высохненю помальованы предмети можна помальовати ище раз барз тонько лякером, котрый надає фарбі полыск и одностайну поверхню. С мальованьом дверей, окон, столов и поличок треба ся понагляти, покля єст сонце, бо погодивше схнут барз поволи.

## Волосы сут окрасом женщин.

Волосы потребуют плеканя и старанного удержаня. Волосы мягкы о красном полыску сут доказом здравя, але лем втотчас, як сут удержаны чисто и старанно. Волосы толсты, закурены, зліплены разом сут отражаючи, выпадают скоро и часто збивають ся в колтун. Случат ся тото часто по долшой хвороті, коли человек слабый не може свободно учесати ся, а недуг спричинят виділяне ся поту.

Другым недугом волося сут парплі (lupiež) Парплями называєме луценє єя скоры, часом незначне, а часом сильне. Часто скоро на голові виділят дуже толщю, котрый громадит ся в малы кульки при насаді волося и спричинят их выпаданє. С тима недугами можна бороти ся лем через чисте удержанє головы. Треба часто мыти голову в теплої воді с мылом и старанно сполокати водом. При парплях найлучше єст мыти волосы сірым мылом очищеным, котре можна достати в каждой аптеці. Мыло таке розварят ся в воді на масу и вливат ся до миски с водом.

До сполоканя и до мытя головы треба уживати мягку воду, до котрой добре єст додати ложочку оцту, або отвару румянку. Волосы треба часто чесати густым гребеньом, котрый чистит волосы с пороку. Дітям найлучше острічи волосы коротко, бо таким способом єст легче удержати голову чисто.

## СЕСИЯ СЕЙМА И СЕНАТА.

Дня 4. т. м. скликано на годину 10-ту рано на назвычайну сесию Сейм, а того самого дня о год. 4-той по пол. открыто незвычайну сесию Сената.

Предметом обрад было открытє сесии и обнятє председательства через назначеного найстаршого посла ци сенатора, зложенє

через послов и сенаторов присягы на руки председателей Сейма и Сената, выбор маршалов Сейма и Сената, зміна регулямину обох палат и выбор президии, т. є. вице-маршалов и секретарей обох палат.

## ПРЕДСКАЗУЮТ ЗМІНЫ В ПРАВИТЕЛЬСТВІ.

Дня 2. жолтня принял Президент Р. П. на Замку инспектора военных сил ген. Рыдз-Смиглого и погодивше министра Бека.

В политычных кругах Варшавы придають тым конференциям велике значенє и предсказуют, же тоты конференции сут в звязи с наступити маючими персональными змінами в правительстві. Змін тых надіють ся в будучом тыждні и мають они обняти кромі змін на килькох постерунках министров, также назначенє першого вицеминистра военных діл, котрым має быти оден с генералов, начальников О. К.

## Война абисынско-италианскá уж ся начала.

Дня 3. т. м. ударили италянскы войска на Абиссинию и начали бомбардовати Адуа и килька других місцевостей, в том числі місто Адиграф. Місцевости тоты лежат в полночной части Абиссинии. Цисар Абисинии выслал Лигі Народов протест против италянскому нападowi. Так само Муссолини повідомил Лигу Народов о начатю военной акции и подал, же выдал приказ заняти килька военных пунктов прото, же Абисиния зарядила загальну мобилизацию, што грозило Италии атакoм со стороны Абисинии.

Газеты подають, же война италянско-абисынска не потягне за собом войны в Европі и же если бы аж и пришло до столкновения Италии с Англиом, то ограничит ся оно до акции на Средземном Морі.

## НАФТА НА ВАГУ ЗОЛОТА.

До войны италянско-абисынской мусіло дойти, бо Абисиния має великы поклады нафты, котрой потребує Италия. Але на тоту нафту має апетит также и Англия, котра именно для той самой причины старала ся всіма силами не допустити до войны, а тепер старат ся перешкодити италянам опановати тот богатый в нафту край. Ніт в том нич дивного, бо світом рядит днеска нафта. Теперешный промысл и транспорт операют ся на нафті. Нафта служит, яко двигательна сила при самоходах, рольных машинах и аж и льокомотывах, аероплянах и цепелинах. Смолу, а также помаду до ворг робит ся с нафты. Книжки и газеты сут друкованы фарбом, котрой без нафты не можна выпродуковати. Половина кораблей, курсующих по морях и океанах єст порушана нафтовом ропом. Аж и штучну гуму продукує ся с нафты.

Велике значенє має нафта для войска. Тепер „піхота“ їздит самоходами, „кавалерия“ вмісто коней, послугує ся автами, артилерию не тягнут коні, лем тректоры. Без нафты каждая армия єст безсильна, —кто має нафту, тот рядит світом.

Лем дві державы на світі сут правдивыма силами под възглядом богатства нафты. Перша с них, то Сполучены Державы Полночной Америки, котры продукують и мають до розпорядимости ¾ части цілої світовой продукции. На другом місці стоит Россия Совітска, котра має 1/8 часть світовой продукции нафты. Англия перестала уж быти силом в полном значеню того слова. Рочно потребує она 1.300.000 литров нафты, а сама може выпродуковати ледво 1/10 часть того запотребованя. Тож прото капитал английскый старат ся о каждую концессию нафтову, прото и тепер так боронит діла абисынскы, штобы опановати богаты поклады нафты, якы находят ся в Абисинии. Если бы Англия стратила концессии нафтовы, стала бы ся безсильна. Всі военны кораблі, аеропляны и цілый военный материал был бы безужиточный.

Геолыгы обчисляют, же в землі находит ся ище 24 милионы цистерн ропы. Рочне запотребованє світове выносит полтора милиона бочок, в виду чого грозит опасность, же по недалгом часі забракне на світі нафты.

## МОРАТОРИЯ ДЛЯ РОЛЬНЫХ ДОЛГОВ.

Дня 1. жолтня т. р. оголошено в „Дневнику Законов“ два декреты Президента Р. П. Перший декрет продолжат мораторию ипотечных долгов от 1. жолтня т. р. до 1 січня 1938. Другый декрет змінят попередны зарядженя, а именно зарядженє Президента Р. П. с дня 24. жолтня 1934. о конверсии и упорядкованю рольных долгов и закон с 24. марта 1933. о роземчих урядах. Декрек тот вводит важны зміны.

Передовсем декрет тот заряджат, же всі долги рольны, пороблены перед дньом 1. липня 1932 р. мають быти сплачаны аж от 1. жолтня 1938 р. Относит єя тото до рольных долгов, затыгнених у кредиторов приватных. Кредитор не має права жадати от должника сплаты рольного долга, ани назначених роземчим урядом рат перше, аж 1. жолтня 1938 р. Таксамо не має права жадати сплаты процентов, судовых коштов и иных належностей, котры повстали перед 1. листопада 1934. и то без възгляда на принадлежность господарства до одной с трох групп и без възгляда на тото, ци долг был упорядкованный с силы самого права, ци тыж зарядженєм роземчого уряда.

Декрет вводит также змїну в области валютовой, а именно, если стороны до дня 1. жолтня 1935. не погодили ся што до курсу заграничной валюты на польску, то в таком разі обовязує курс с дня 1. жолтня 1935 р.

Декрет обнижат также процент с дотеперешных 10% рочно до 6% рочно.

Декрет тот єст правдивым добродійством для селян, котры в теперешных тяжких часах не могли платити рат, в послідстві чого грозили им банкротства. За три роки або змінят ся часы, або правительство, котре опекує ся селянством, возме их зас в свою оборону.





## Што чути в світі.

**Шанхай:** Поїзд військовий, складаючийся з локомотиву і 15 вагонів, котрий везе частину 10-ї дивізії до провінції Шенси, в цілі здавлення комунізму, виколоївся і сточився по убої горі в 30-метрову пропасть. 200 вояків убило ся, а других 200 єсть тяжко ранених.

**Медже Румуниом и Совітами** дошло до розумлення в ділі прилучення Румунії до пакта Совітско-чехословацького. Міністер заграничних справ Титулеску заявив комісарови Литвинову, же Румунія годить ся перепустити совітські війська через свої території. Пакт має бути підписаний в Москві в часі побыва міністра Титулеску в Росії.

**Москва:** 30.000 робітників приступило до роботи над будовою другої штреки метро (підземельна залізниця) в Москві, котра буде довга на 11 км. Будова тота єсть обчислена на 2 роки. На трасі той стануть 2 станції надземельні і 7 підземельних.

**Москва** с дня 1.Х. Рада Комісарей Народних знесла декретом картку провіантов і запровадила свободну продаж провіантов в цілій державі по ustalених цінах. Продукти сун продавані в державних склепах. Кождий може купити собі денно 1—3 кг. в завимости от гатунку провіантанта.

**Берлін:** В склепах берлінських зазначил ся недостаток масла і смальцу. В місті видно перед склепами толпи купуючих. Склепы ограничили продаж толщу, выдаючи лем половину жаданого количества.

**Женева:** Рада Лиги Народов в разі примінєня санкцій проти Італії предвиджує слідуєчи кроки: 1) Перерванє дипломатичних сношень 2) Постепенна прєсія господарча 3) Бльокада всіх портів італіянських.

**„Moravsko-Slezsky Denik“** накликує чєске правительство до звернення уваги на Подкарпатську Русь, котрої значєнє для Чехословаччини єсть в виду теперешних отношень політичних в Європі барз велике. В тих условиях, пише дальше газета, ніт бесіди о том, штобы Подкарпатська Русь могла достати полную автономію.

**Стан Кольорадо.** Президент Рузвельт присутствовал при началю работ тамы на ріці Кольорадо. Єсть то найбільша тама на світі. Высота їй выносит 220 м. а довгота 360 м. Будова має коштувати 160 миллионів долларів. Тама даст енергію електричну всім станам полуднево-западным.

**Китай.** Правительство нанкинське приступило до енергичной борби с курєнем опію, за што грозить кара смерті. Страчено уж понад 1000 люда. Перед страченєм обвозят засуджєных по місті для отстрашенія других і пак стинають им головы.

**Берлін.** До Берліна приїхал премієр венгерський Гембеш, котрий конферовал 2 години с Гітлером, а потом вел долги бесіди с генералициом німецьком і нім. мин.

загран. діл. В кругах політичних бесідуєт, же цілє той визити єсть заключєнє авіаційного пакта медже Німєччином і Венграми. До того пакта хотят также притягнути і Польщу.

**Атєны** (Греція) С Сяльоник доносят о кривавых уличных розрухах, вызликаних приїздом одного с проводыров послідного повстанія Венізелюса, Софоулуса. Власти выслали отряд кавалєрії, котра остром шаржом росогнала воєуючих політичных противников. Перешло 200 люда єсть тяжко ранених.

**Софія** (Болгарія) Правительство болгарське оголосило дна 2.Х. стан военный в цілій державі. Причином того єсть выкрытє опасного заговора, во главі котрого стояли участники організації „Звєно“. Заговорчики стрємили обалити правительство, усунути короля Борыса і оголосити рєпублику. Правительство опановало положєнє. В цілій Болгарії панує уж мир і порядок.

## Вісти с краю.

**Варшава:** Суд окружный в Варшаві оголосил вирок, котрым засудил Наума Гальберштата на 8 місяців тюрмы за образу канцлєра Гітлєра через написанє оскорбительных слов на копєрті писма.

**В Сосновці** на копальні „Чєлядзь“ в послідстві заломанія ся деревяного лєвара в сортовні с высоты 3 метрив упали 3 вагоны, наладованы угльом разом с робітниками. Робітники сун тяжко ранєны.

**В Вильні** стало ся правдивє чудо. С окна 3-го поверха выпала 1½ рочна дітина і нич ся їй не стало. Прикликаний лікар не нашол жадного потолчєнє, ани внутрішних, ани внішних.

**Львов.** Украинцы приготовили подрєбну програму політики економічної і культуральной. Жадають они знесєня назвы „русин і „русский“ і введєня назвы „українец“ і „український“, утворєня катєдры українського язика на львовському університєті і отданія „Народного Дома“ во Львові.

На терєнах поодыноких Окружных Т-в Рольных иде оживлена акція, котра має на цілі беспосередну доставку войску рольных продуктів, як солома, сіно, картоплі, капуста і т. д. Тым способом хотят Окр. Т-ва Рольны поднести ціну рольных продуктів і освободити газдов от вызыску посередников-спекулянтов.

**Чєнстохова:** С вязніцы в Чєнстохові освободжєно 11-ох члєнов Народного Стронництва, котрых арєштовано в часі выбєрательной акції.

В р. 1935 было в Польщі поля засіяного житом 5.730.000 гєктаров. В р. 1934 было засіяно 5.677.000 гєктаров, с чого видно, же продукция жита в Польщі поднесла ся. Занимат она 350% цілої продукции жита в Європі.

**Тарнополь:** В звязи с послідными змінами в отноєниях польско-українських, кружат в українських учительських кругах вісти о том, же в скором часі замінят приватну українську гімназію в Тарнополі на державну. Українськи націоналисты с Гірняком Никифором во главі сун тому противны, бо боят ся, же не будут могли выховати молодежи в духу шовинистично-національном.

КТО ХОЧЕ ЗАБЕЗПЕЧИТИ СЯ  
НА СТАРОСТЬ, АБО ЗЛОЖИТИ ДІТЯМ  
ПРИДАНЕ НАЙ

**Заасєкурує ся  
в Асєк. Товаристві  
Вита и Краковське  
во ЛЬВОВІ**

В ЗИМІ ОТБУДЕ СЯ В КРЫНИЦІ СЕЛІ  
**курс ткацький**

Оплата за науку на курсі выносит 2 зл. Участники курсу не достають поміщенія і удержанія. Курсанты мусят пригото-  
вити льняну, або волняну пряджу. Мусят они собовязати ся перестєрігати  
рыгор школьний.

Зголоєнєня приймає администрація  
газєты Лємко в Крыниці.

**Важне для читалєнь и аматорських кружков!**

В КРЫНИЦІ-СЕЛІ ОТБУДЕ СЯ ДВО-МІСЯЧНЫЙ  
**КУРС ДЫРЫГЕНТОВ ХОРОВ.**

Курс начне ся 1. листопада т. р. і обиймє теорію і прак-  
тику потребну до ведєня аматорських хоров. Будє учити ся  
также церковного співу.

Оплата за науку на курсі выносит 20 злотых.  
Курсанты с инших сєл достанут поміщенє, без удержанія.  
Удержанє мусит покрити сам курсант.

Кромі того устроює ся в том самом часі также  
**ВЫСШИЙ КУРС**  
для тых, котры уж в прошлом року окончили курс низший.  
Оплата за курс высший выносит 25 злотых.

Зголоєнєня приймає  
г-н Александр Ропицький в Крыниці, Здрою  
(дом г-на Александра Поглида)